

O debate territorial no mundo é o principal asunto da nova entrega de Tempo exterior, revista de análise e estudos internacionais, que edita o IGADI (Instituto Galego de Análise e Documentación Internacional, <http://www.igadi.org/>), radicado en Baiona, e dirixe **Xulio Ríos**.

Cando no Estado español se está a debater sobre a reforma dos estatutos e unha nova arquitectura competencial, Tempo exterior trata de achegar a ese debate unha reflexión complementaria sobre a diversidade casuística que afecta ao equilibrio territorial en espazos tan afastados uns de outros como Quebec (**Stephane Paquin**), Kurdistan (**Manuel Martorell**), Porto Rico (**Angel Israel Rivera**) ou China (**Natalia G. Collado**). En todos eles, o problema do artellamento político-territorial é unha das claves esenciais do seu presente e futuro.

O segundo tema deste Tempo exterior é o referente á reforma da ONU, un dos eixes centrais do debate internacional nos próximos meses. A revista presenta catro estudos relativos aos plans xerais de reforma (**Carlos Jiménez**), as propostas para modificar o Consello de Seguridade (**Rosa Riquelme**), os desafíos que debe encarar en materia de seguridade internacional (**Rafael García Páez**) e as relacións da ONU cos novos actores globais (**Mónica Salomón**).

A actualidade ven da man de cinco achegas adicionais, nas que se aborda a nova etapa iniciada en Palestina e o proceso de paz trala morte de Yasir Arafat (**Roberto Mansilla**), e tamén se destacan os estudos sobre o cambio político en Uruguai co triunfo da esquerda de Tabaré Vázquez (**Hugo Cores**), a necesidade dun novo enfoque, menos economicista, no MERCOSUR (**Eduardo Rivas**); a cada vez maior presenza do fundamentalismo cristián e evangélico na configuración da política exterior estadounidense (**Jared Larson**) e a situación dos medios de comunicación en China (**Georgina Giguera**).

O debate territorial no mundo e a reforma da ONU

Escrito por

Martes, 19 Xullo 2005 09:59

Un conxunto de temas e de voces moi autorizadas, procedentes de diferentes latitudes e extraccións profesionais que consolidan Tempo Exterior como unha revista de referencia nos estudos internacionais, a única en España que non é editada en castelán.

Os textos poden consultarse en <http://www.igadi.org/> e poden solicitarse exemplares en: info@igadi.org, ou adquirila en librarías.